

Rakan kongsi ugut bongkar pembabitan Najib, 'mem'

BH- 18/2/2020 m/s: 6

Saksi dakwa Rayyan minta bantu jumpa Najib untuk rampas semula projek daripada Jepak

Oleh Farah Marshita Abdul Patah
farahmarshita@bh.ocm.my

Kuala Lumpur: Rakan kongsi kepada Pengarah Urusan Jepak Holdings Sdn Bhd (Jepak), Rayyan Radzwill Abdullah, mengugut untuk membongkar pembabitan Datuk Seri Najib Razak dan isterinya, Datin Seri Rosmah Mansor dalam urusan perolehan projek solar hibrid kepada pembangkang.

Ugutan itu dibuat susulan per selisihan faham antara Pengarah Urusan Jepak, Saidi Abang Samuddin dengannya sehingga menyebabkan Rayyan berusaha merampas kontrak projek itu daripada Saidi.

Bekas Ketua Setiausaha (KSU) Kementerian Pendidikan, Tan Sri Dr Madinah Mohamad, 64, dalam pernyataan saksinya, berkata antara Oktober atau November 2017 dan Mei 2018, Rayyan menghantar banyak mesej menerusi WhatsApp kepadanya.

Daripada mesej itu, beliau mendapati Rayyan berselisih faham dan mendakwa Saidi melakukan pelbagai kesalahan dalam projek solar hibrid seperti mengubah terma kontrak asal, membuat tuntutan palsu dan menipu wang beberapa pihak.

"Tujuan Rayyan memberitahu saya perkara itu adalah supaya

saya akan membantu dia berjumpa Najib bagi merampas kontrak projek solar hibrid daripada Saidi dan Jepak.

"Rayyan juga memberitahu saya dia akan membongkarkan pembabitan 'PM' dan 'mem' dalam urusan perolehan projek itu kepada pembangkang sekiranya saya tidak membantu," katanya.

Madinah yang juga bekas Ketua Audit Negara berkata beliau tidak melayan permintaan dan mesej Rayyan, namun pada peringkat awal pernah menghubungi Rayyan dengan Ketua Setiausaha Sulit Najib, Datuk Iskandar Kaus bagi urusan temu janji.

Saksi keenam pendakwaan itu juga berkata, beliau turut mengarahkan pegawainya untuk mengaudit pembayaran Kementerian Pendidikan kepada Jepak dalam projek solar hibrid selepas Rayyan mengadu isu pembayaran tidak teratur.

Terdahulu, pada awal prosiding hari ketujuh semalam, Madinah berkata, projek solar hibrid yang dicadangkan Jepak adalah berisiko tinggi.

Anggaran kos yang terbabit adalah RM1.25 bilion membabitkan skop pelaksanaan meluas oleh satu syarikat dan terdapat pelbagai isu lain.

Madinah berkata, pelaksanaan projek solar hibrid Jepak adalah atas arahan Najib dan bukan inisiatif Kementerian Pendidikan.

Katanya, perkara itu dimaklumkan kepada Kementerian Kewangan menerusi surat kepada Setiausaha Bahagian Perolehan Kerajaan di Kementerian Kewangan ketika itu, Datuk Othman Semail.

Beliau berkata, projek solar hibrid itu tiada dalam perancangan pembangunan Kementerian Pen-



Rayyan juga memberitahu saya dia akan membongkarkan pembabitan 'PM' dan 'Mem' dalam urusan perolehan projek itu kepada pembangkang sekiranya saya tidak membantu.

Madinah Mohamad,
Bekas Ketua Setiausaha
Kementerian Pendidikan

didikan, selain tidak wujud keperluan mendesak di peringkat kementerian untuk menyegerakan urusan perolehan projek.

Rancangan pembekalan tenaga elektrik sedia ada dalam Kementerian Pendidikan, katanya, adalah projek genset diesel dan penyambungan ke talian grid elektrik sahaja.

"Tanpa minit Najib bertarikh 7 Jun 2016, saya tidak melayan Jepak yang tidak memberikan pecahan kos dan maklumat mengenai skop kerja terperinci dan perunding bertauliah yang dilantik

untuk projek ini," katanya.

Madinah berkata, pengalaman Jepak dalam mengendalikan projek kerajaan adalah merujuk kepada pengalaman membekalkan perkhidmatan pembekalan diesel dan penyelenggaraan genset diesel dalam projek genset diesel sahaja.

"Setahu saya, Jepak hanya memiliki kelayakan menjalankan kerja sivil dan mekanikal daripada carian CIDB yang pernah ditunjukkan kepada saya," katanya.

Madinah berkata, dalam memo Ketua Setiausaha Kementerian Pendidikan kepada Menteri Pendidikan bertarikh 16 Jun 2016, beliau menyatakan beberapa masalah berkenaan status pertimbalan projek solar hibrid pada masa itu.

"Saya menekankan kepada Datuk Seri Mahdzir Khalid bahawa kos terperinci bagi pemasangan setiap solar dan kos penyelenggaraan tidak dikemukakan oleh Jepak," katanya.

Rosmah, 68, mengaku tidak bersalah atas pertuduhan meminta RM187.5 juta dan dua pertuduhan menerima rasuah RM6.5 juta daripada Pengarah Urusan Jepak Holdings Sdn Bhd, Saidi Abang Samsudin, menerusi bekas pembantu Rosmah iaitu Datuk Rizal Mansor bagi projek membekalkan tenaga solar kepada 369 sekolah luar bandar di Sarawak.

Rosmah didakwa melakukan perbuatan itu di tiga tempat berasingan iaitu Lygon Cafe, Sunway Putra Mall, Jalan Putra; di kediamannya di Jalan Langgak Duta, Taman Duta dan di Kediaman Seri Perdana, Persiaran Seri Perdana, Presint 10, Putrajaya, antara Januari 2016 dan 7 September 2017.